

摘藻堂四庫全書薈要

史部

欽定四庫全書薈要

史部

通志卷一百三十四

詳校官員外郎

臣

楊世綸



欽定四庫全書薈要卷九千五十一

史部

通志卷一百三十四

宋右迪功郎鄭樵漁仲撰

宋史列傳第四十七

褚裕之

兄秀之

秀之子

淡之

蔡廓

子興宗

何尚之

父叔度

子偃

張裕

子張邵

子敷弟悅

兄子暢

暢子浩

暢子淹

范泰

子曄

孔熙先

荀

伯子

族弟昶

昶子萬秋

徐廣

郗紹

鄭鮮之

裴松之

何承

天

褚裕之字叔度河南陽翟人晉太傅裒之曾孫也祖歆  
祕書監父爽金紫光祿大夫長兄秀之字長倩歷大司  
馬琅邪王從事中郎黃門侍郎武帝鎮西長史秀之妹  
晉恭帝后也秀之雖晉氏姻戚而盡心於武帝遷侍中  
出補大司馬右司馬晉恭帝即位為祠部尚書宋受命  
徙太常元嘉初卒於官秀之弟淡之字仲原亦歷顯官  
為武帝車騎從事中郎尚書吏部郎廷尉卿左衛將軍

宋受命為侍中淡之兄弟並盡忠事武帝恭帝每生男輒令方便殺焉或誘賂內人或密加毒害前後如此非一及恭帝遜位居秣陵宮常懼見禍與褚后共止一室慮有耽毒自煮食於前武帝將害之不欲遣人入內令淡之兄弟視后褚后出別室相見兵人乃踰垣而入進藥於恭帝帝不肯飲曰佛教自殺者不復得人身乃以被掩殺之後會稽郡缺朝議欲用蔡廓武帝曰彼自是蔡家佳兒何關人事可用褚佛佛淡之小字也乃用淡

之為會稽太守景平二年富陽孫氏聚合門宗謀反其  
支黨在永興縣潛相影響永興令羊恂覺其謀以告淡  
之淡之不信乃以誣人之罪收縣職局於是孫法先自  
號冠軍大將軍與孫道慶等攻沒縣邑更相樹置遙以  
鄮令司馬文宣為征西大將軍建旗鳴鼓直攻山陰淡  
之自假陵江將軍以山陰令陸邵領司馬加振武將軍  
前員外散騎常侍王茂之為長史前國子博士孔欣前  
員外散騎常侍謝苓之並叅軍事召行叅軍七十餘人

前鎮西諮議參軍孔寧子左光祿大夫孔季恭子山士  
並在艱中皆起為將軍遣隊主陳願郡議曹掾虞道納  
二軍過浦陽江願等戰敗賊遂推鋒而前去城二十餘  
里淡之遣陸邵水軍拒之而身率所領出次近郊邵與  
行參軍漏恭期合力大破賊於柯亭淡之尋卒諡曰質  
子裕之名與武帝同故行字焉初為太宰琅邪王行參  
軍武帝車騎參軍司徒左西屬中軍諮議參軍署中兵  
加建威將軍從征鮮卑盡其誠力盧循攻查浦叔度力

戰有功循南走武帝版行廣州刺史加都督建威將軍  
領平越中郎將在任四年廣營賄貨資財豐積坐免官  
禁錮終身還至都凡詣親友及一面之款無不厚加贈  
遺尋除太尉諮議參軍相國右司馬武帝受命為右衛  
將軍武帝以其名家而能竭盡心力甚嘉之封番禺縣  
男尋加散騎常侍永初四年出為雍州刺史領寧蠻校  
尉在任三年以清簡致稱景平二年卒子恬之嗣恬之  
弟寂之著作佐郎早卒寂之子暖尚文帝第六女琅邪



真長公主位太宰參軍亦早卒曖子續位太子舍人亦  
尚公主續子球梁史有傳秀之子湛之字休元尚武帝  
第七女始安哀公主拜駙馬都尉著作佐郎哀公主薨  
復尚武帝第五女吳郡宣公主諸尚主者並因世胄不  
必皆有才能湛之謹實有意幹故為文帝所知歷顯位  
為太子中庶子司徒左長史侍中左衛將軍左戶尚書  
丹陽尹元凶弑逆以為吏部尚書復出為丹陽尹統石  
頭戍事孝武入伐劬自攻新亭壘使湛之率水師俱進

湛之因攜二息淵澄登輕舟南奔淵時始生一男為劬  
所殺孝武即位以為尚書右僕射孝建元年為中書令  
丹陽尹後拜尚書左僕射以南奔賜爵都鄉侯大明四  
年卒諡敬侯淵列在齊史

蔡廓字子度濟陽考城人晉司徒謨之曾孫也祖系撫  
軍長史父絀司徒左西屬廓博涉羣書言行以禮起家  
著作佐郎後為武帝太尉參軍中書黃門郎以方便閑  
素為武帝所知再遷太尉從事中郎未拜遭母憂性至

孝三年不櫛沐殆不勝喪宋臺建為侍中建議以為鞠  
獄不宜令子孫下辭明言父祖之罪虧教傷情莫此為  
大自今但令家人與囚相見無乞鞠之訴便足以明伏  
罪不須責家人下辭朝議從之世子左衛率謝靈運輒  
殺人御史中丞王准之坐不糾免官武帝以廓剛直不  
容邪枉補御史中丞多所糾奏百僚震肅時中書令傅  
亮任寄隆重學冠當時朝廷儀典皆取定於亮亮每事  
諮廓然後行亮意若有不同廓終不為屈遷司徒左長

史出為豫章太守徵為吏部尚書廓因北地傳隆問亮  
選事若悉以見付不論不然不能拜也亮以語錄尚書  
事徐羨之羨之曰黃門郎以下悉以委蔡吾徒不復措  
懷自此已上故宜共參同異廓曰我不能為徐干木署  
紙尾遂不肯拜干木羨之小字也選案黃紙錄尚書與  
吏部尚書連名故廓言書紙尾也羨之亦以廓正直不  
欲使居權要徙為祠部尚書文帝入奉大統尚書令傅  
亮率百寮奉迎廓亦俱行至尋陽遇疾不堪前亮將進

路詣別廓謂曰營陽在吳宜厚加供奉一旦不幸卿諸  
人有弑主之名欲立於世何可得邪時亮已與羨之議  
害少帝乃馳信止之信至已不及羨之大怒曰與人共  
計云何裁轉背便賣惡於人及文帝即位謝晦將之荆  
州與廓別屏人問曰吾其免乎廓曰卿受先帝顧命任  
以社稷廢昏立明義無不可但殺人二昆而以之北面  
挾震主之威據上流之重以古推今自免為難也廓年  
位並輕而為時流所推重每至歲時皆束帶詣門奉兄

軌如父家事大小皆諮而後行公祿賞賜一皆入軌有  
所資須皆就典者請焉從武帝在彭城妻郝氏以書求  
夏服廓答曰知須夏服計給事自應相供無容別寄時  
軌為給事中元嘉二年廓卒武帝常云羊徽蔡廓可平  
世三公少子興宗字興宗幼為父廓所重謂有已風與  
親故書曰小兒四歲神氣似可不入非類室不與小人  
游故以興宗為之名興宗為之字年十歲喪父哀毀有  
異凡童廓罷豫章郡還起二宅先成東宅以與兄軌軌

罷長沙郡還送錢五十萬以禪宅直興宗年十一白母

曰一家由來豐儉必共今日宅直不宜受也母悅而從  
焉軌深有愧色謂其子淡曰我年六十行事不及十歲  
小兒尋又喪母少好學以業尚素立見稱為中書侍郎  
中書令建平王宏侍中王僧綽並與之厚善元凶弒立  
僧綽被誅凶威方盛親故莫敢往興宗獨臨哭甚哀孝  
武踐阼累遷尚書吏部侍郎時尚書何偃疾患上謂興  
宗曰卿詳練清濁今以選事相付便可開門當之無所

辭也後拜侍中每正言得失無所顧憚孝武新年拜陵興宗負璽陪乘及還上欲因以射雉興宗正色曰今致虔園陵情敬兼重從禽猶有餘日請待他辰上大怒遣令下車由是失旨竟陵王誕據廣陵為逆事平孝武輿駕出宣陽門敕左右文武叫稱萬歲興宗時陪輦帝顧曰卿獨不叫興宗從容正色答曰陛下今日政應涕泣行誅豈得軍中皆稱萬歲帝不悅興宗奉旨慰勞廣陵州別駕范義與興宗素善在城內同誅興宗至躬自收



殯致喪還豫章舊墓上聞謂曰卿何敢故爾觸網興宗  
抗言答曰陛下自殺賊臣自葬周旋既犯嚴制政當甘  
於斧鉞耳帝有慙色又廬江內史周朗以正言得罪鑕  
付寧州親戚故人無敢贍送興宗時在直請急詣朗別  
上知之尤怒坐屬疾多日白衣領職後為廷尉卿有解  
士先者告申坦昔與丞相義宣同謀時坦已死子令孫  
作山陽郡自繫廷尉興宗議曰若坦昔為戎首今身尚  
存累經肆眚猶當蒙宥令孫天屬理相為隱况人亡事

遠追相誣訐斷以禮律義不合闕見從出為東陽太守  
後為左戶尚書轉掌吏部時上方盛淫宴虐侮羣臣自  
江夏王義恭以下咸加穢辱唯興宗以方直見憚不被  
侵嫖尚書僕射顏師伯謂儀曹王耽之曰蔡尚書常免  
昵戲去人實遠耽之曰蔡豫章昔在相府亦以方嚴不  
狎武帝宴私之日未嘗相名每至官賭常在勝朋蔡尚  
書今日可謂能負荷矣大明末前廢帝即位興宗告太宰  
江夏王義恭應須策文義恭曰建立諸副本為今日復

安用此興宗曰累朝故事莫不皆然近永初之末營陽王即位亦有文策今在尚書可檢視也義恭不從時義恭錄尚書受遺輔政阿衡幼主而引身避事政歸近習越騎校尉戴法興中書舍人巢尚之專制朝權威行遠近興宗職管九流銓衡所寄每至上朝輒與令錄以下陳欲登賢進士之意又箴規得失博論朝政義恭素性恒撓阿順法興恒慮失旨每聞興宗言輒戰懼無計先是大明世奢侈無度多所造立賦調煩嚴徵役過苦至

是發詔悉皆削除由此紫極殿南北馳道之屬皆被毀壞自孝建以來至大明末凡諸制度無或存者興宗於都坐慨然謂顏師伯曰先帝雖非盛德要以道始終三年無改古典所貴今殯宮始撤山陵未遠而凡諸制度興造不論是非一皆刊削雖復禪代亦不至爾天下有識當以此窺人師伯不能用興宗每奏選事法興尚之等輒點定回換僅有存者興宗於朝堂謂義恭及師伯曰主上諒闇不親萬機選舉密事多被刪改非復公筆

迹不知是何天子意王景文謝莊等遷授失序興宗又欲改為美選時薛安都為散騎常侍征虜將軍太子率殷恒為中庶子興宗先遷安都為左衛將軍常侍如故殷恒為黃門領校太宰嫌安都為多欲單為左衛興宗曰率衛相去幾何之間且已失征虜非乃超越復奪常侍則頓為降貶若謂安都晚遇微人本宜裁抑今名器不輕宜有選序謹依選體非私安都義恭曰若宮官宜加越授者殷恒便應侍中那得為黃門而已興宗又曰

中庶侍中相去實遠且安都作率十年殷恒中庶百日  
今又領校為不少也使選令史顏禕之薛慶先等往復  
論執義恭然後署案既而中旨以安都為右衛加給事  
中由是大忤義恭及法興等出興宗為吳郡太守固辭  
又轉南東海太守又不拜苦求益州義恭由是大怒上  
表言興宗之罪詔付外詳議義恭因使尚書令柳元景  
奏興宗及尚書袁愍孫私相許與自相選署亂羣害政  
混穢大猷於是除興宗永昌太守郡屬交州朝廷喧然

莫不嗟駭先是興宗納何后寺尼智尼為妾姿貌甚美  
迎車已去而師伯密遣人誘之潛往載取興宗迎人不  
覺及興宗被徙論者並言由師伯師伯甚病之法興等  
既不欲以徙大臣為名師伯又欲止息物議由此停行  
頃之法興見殺尚之被繫義恭師伯並誅復起興宗為  
臨海王子頃前軍長史南郡太守行荊州事不行時前  
廢帝凶暴興宗外甥袁顗為雍州刺史固勸興宗行曰  
朝廷形勢人情所見在內大臣朝夕難保曷今出居陝

西為八州行事顗在襄沔地勝兵彊去江陵咫尺水陸  
通便若一朝有事可共立桓文之功豈與受制凶狂禍  
難不測同年而語乎興宗曰吾素門平進與主上甚疎  
未容有患宮省內外既久不自保比者會應有變若內  
難得弭外釁未可量汝欲在外求全我欲居內免禍各  
行所見不亦善乎時士庶危懼衣冠咸欲遠徙後皆流  
離外難百不一存重除吏部尚書太尉沈慶之深慮危  
禍閉門不通賓客嘗遣左右范羨詣興宗屬事興宗謂



羨曰公關門絕客以避悠悠之請謁耳身非有求何為  
見拒羨復命慶之使要興宗興宗因說之曰主上比者  
所行人倫道盡今所忌憚唯在於公公威名素著天下  
所服今舉朝惶惶人懷憂怖指麾之日誰不景從如其  
不斷旦暮禍及僕昔佐貴府蒙眷異常故敢盡言願思  
其計慶之曰僕比日前慮不復自保但盡忠奉國始終  
以之正當委天任命耳加老罷私門兵力頓闕雖有其  
意事亦無從興宗曰當今懷謀思奮者非欲要富貴期

功賞各欲救死朝夕耳殿內將帥正聽外間消息若一人唱首則俯仰可定況公威風先著統戎累朝諸舊部曲布在宮省誰敢不從僕在尚書中自當唱率百僚案前世故事更簡賢明以奉社稷又朝廷諸所行造人間皆言公悉豫之今若沈疑不決當有先公起事者公亦不免附惡之禍也且車駕屢幸貴第酣醉彌留又聞斥屏左右獨入閣內此萬世一時機不可失僕荷眷深重故吐去梯之言公宜祥其禍福慶之曰此事大非僕所

能行事至政當抱忠以沒耳頃之慶之果以見忌致禍  
時領軍將軍王元謨大將有威名邑里訛言元謨當建  
大事或言已見誅元謨典籤包法榮家在東陽興宗故  
郡人也為元謨所信使至興宗間興宗謂曰領軍比日  
殊當憂懼法榮曰頃者殆不復食夜亦不眠常言收已  
在門不保俄頃興宗因法榮勸元謨舉事元謨又使法  
榮報曰此亦未易可行其當不泄君語右衛將軍劉道  
隆為帝所寵信專統禁兵乘輿嘗夜幸著作佐郎江敷

宅興宗乘馬車從道隆從車後過興宗謂曰劉公比日  
思一閑道隆深達此旨指興宗手曰蔡公勿言時帝每  
因朝宴捶毆羣臣自驃騎大將軍建安王休仁以下侍  
中袁愍孫等咸見陵曳唯興宗得免頃之明帝定大事  
元謨責所親故吏郭季產女壻韋希真等曰當艱難時  
周旋輩無一言相叩發者季產曰蔡尚書令包法榮所  
道非不會機但大事難行耳季產言亦何益元謨有慙  
色當明帝起事之夜廢帝橫屍太醫閣口興宗謂尚書

左僕射王景文曰此雖凶悖要是天下之主宜使喪禮粗足若直如此四海必將乘人時諸方並舉兵反朝廷所保唯丹陽淮南數郡其間諸縣或已應賊東兵已至永世宮省危懼上集羣臣以謀成敗興宗曰宜鎮之以靜以至信待人比者逆徒親戚布在宮省若繩之以法則土崩立至宜明罪不相及之義上從之遷尚書右僕射尋領衛尉明帝謂興宗曰頃日人情言何事當濟不興宗曰今米甚豐賤而人情更安以此算之清蕩可必

但臣之所憂更在事後猶羊公言平吳之後方當勞聖  
慮耳尚書褚淵以手版築興宗興宗言之不已上曰誠  
如卿言褚圻平函送袁顗首敕從登南掖門樓以觀之  
興宗潛然流涕上不悅事平封興宗始昌縣伯固讓而  
許之復封樂安縣伯國秩吏力終不以受時殷琰據壽  
陽為逆遣衛國將軍劉劬攻圍之四方既平琰嬰城固  
守上使中書為詔譬琰興宗曰天下既定是琰思順之  
日陛下宜賜手詔數行今直使中書為詔彼必疑非真

不從琰得詔謂劉勔詐造不敢降久乃歸順先是徐州刺史薛安都據彭城反後遣使歸款泰始二年冬遣鎮軍將軍張永率軍迎之興宗曰安都遣使歸順此誠不虛今不過須單使一人咫尺書耳若以重兵迎之勢必疑懼或能招引北虜為患不測時張永已行不見信安都聞大軍過淮果引魏軍永戰大敗遂失淮北四州其先見如此初永敗問至上在乾明殿先召司徒建安王休仁又名興宗謂休仁曰吾慙蔡僕射以敗書示興宗

曰我愧卿三年出為郢州刺史初吳興丘珍孫言論常  
侵興宗珍孫子景元人才甚美興宗與之周旋及景元  
為鄱陽郡會晉安王子勛為逆轉在竟陵為吳喜所殺  
母老女幼流離夏口興宗至郢州親自臨哭致其喪柩  
家累皆得東還遷會稽太守領兵置佐加都督會稽多  
諸豪右不遵王憲幸臣近習參半宮省封畧山湖妨民  
害政興宗皆以法繩之又以王公妃主多立邸舍子息  
滋長督責無窮啟罷省之并陳原諸逋負解遣雜役並



見從三吳舊有鄉射禮元嘉中羊元保為吳郡行之久  
不復修興宗行之禮儀甚整明帝崩興宗與尚書令袁  
粲右僕射褚淵中領軍劉劭鎮軍將軍沈攸之同被顧  
命以興宗為征西將軍開府儀同三司都督荊州刺史  
加班劔二十人被徵還都時右軍將軍王道隆任參國  
政權重一時躡履到興宗前不敢就席良久方去竟不  
呼坐元嘉初中書舍人狄當詣太子詹事王曇首不敢  
坐其後中書舍人弘興宗為文帝所愛遇上謂曰卿欲

作士人得就王球坐乃當判耳殷劉並雜無所益也若  
往詣球可稱旨就席及至球舉扇曰君不得爾弘還依  
事啓聞帝曰我便無如此何至是興宗復爾道隆等以  
興宗彊正不欲使擁兵上流改為中書監左光祿大夫  
開府儀同三司固辭不拜興宗行已恭恪光祿大夫北  
地傳隆與父廓善興宗常修父友之敬又太原孫敬王  
嘗通興宗侍兒被禽反接興宗命與杖敬王了無忤容  
興宗竒其言對命釋縛試以伎能高其筆札因以侍兒

賜之為立室宇位至尚書右丞其過惡揚善若此敬王  
子庶仕梁以清能位至御史中丞興宗家行尤謹奉歸  
宗姑事寡嫂養孤兄子有聞於世太子左率王錫妻范  
聰明婦人也有才學書讓錫弟僧達曰昔謝太傅奉寡  
嫂王夫人如慈母今蔡興宗亦有恭和之稱其為世所  
重如此妻劉氏早卒一女甚幼外甥袁顗始生子彖而  
妻劉氏亦亡興宗姊即顗母也一孫一姪躬自撫養年  
齒相比欲為婚姻每見興宗輒言此意大明初詔興宗

女與南平王敬猷婚興宗以姊生平之懷屢經陳啓帝  
答曰卿諸人欲各行己意則國家何由得婚且姊言豈  
是不可違之處邪舊意既乖豕亦他娶其後豕家好不  
終顛又禍敗豕等淪廢當時孤微理盡敬猷遇害興宗  
女無子嫠居名門高胄多欲結姻明帝亦敕適謝氏興  
宗並不許以女適豕泰豫元年卒年五十八遺命薄葬  
奉還封爵追贈後授子順固辭不受又奉表疏十餘上  
詔特申其請以旌克讓之風初興宗為郢州府參軍彭

城顏敬以式卜曰亥年當作公官有大字者不可受也  
及有開府之授而太歲在亥果薨於左光祿大夫云文  
集行於世子順字景元方雅有父風位太尉從事中郎  
昇明末卒順弟約樽齊史有傳

何尚之字彥德廬江灑人也曾祖準高尚不應徵辟祖  
恢南康太守父叔度恭謹有行業姨適沛郡劉璩與叔  
度母情愛甚篤叔度母早卒奉姨若所生姨亡朔望必  
往致哀并設祭奠食並珍新躬自臨視若朔望應有公

事則先遣送祭皆手自料簡流涕對之公事畢即往致

哀以是為常三年服竟義熙三年吳興武康縣人王延  
祖為刼父睦以告官新制凡刼身斬刑家人棄市睦既  
自告於法有疑時叔度為尚書議曰設法止姦必本於  
情理非謂一人為刼闔門應刑所以罪及同產者欲開  
其相告以出造惡之身睦父子至親容可悉共逃亡而  
割其天屬還相縛送解腕求存於情可愍並合從原從  
之後為金紫光祿大夫吳郡太守太保王弘每稱其清

身潔已尚之少頗輕薄好擣捕既長折節蹈道以操立  
見稱為陳郡謝混所知與之游處家貧初為臨津令武  
帝領征西補府主簿從征長安以公事免還都因患勞  
病積年飲婦人乳乃得差以從征之勞賜爵都鄉侯少  
帝即位為廬陵王義真車騎諮議參軍義真與司徒徐  
羨之尚書令傅亮等不洽每有不平之言尚之諫戒不  
納義真被廢入為中書侍郎遷吏部郎告休定省傾朝  
送別於治渚及至郡叔度謂曰聞汝來此傾朝相送可

有幾客答曰殆數百人叔度笑曰此是送吏部郎耳非

關何彥德也昔殷浩亦嘗作豫章定省送別者甚衆及  
廢徙東陽船泊征虜亭積日乃至親舊無復相窺者後  
拜左衛將軍領太子中庶子尚之雅好文義從容賞會  
甚為文帝所知元嘉十三年彭城王義康欲以司徒左  
長史劉斌為丹陽尹上不許乃以尚之為之立宅南郭  
外置學聚徒東海徐秀廬江何曇黃回潁川荀子華太  
原孫宗昌王延秀魯郡孔惠並慕道來游謂之南學王



球嘗云尚之西河之風不墜尚之亦云球正始之風尚在尚之女適劉湛子黯而湛與尚之意好不篤湛欲領丹陽乃徙尚之為祠部尚書尚之甚不平湛誅遷吏部尚書時左衛將軍范曄任參機密尚之察其意趣異常白文帝宜出為廣州若在内釁成不得不加鈇鉞屢誅大臣有虧皇化上曰始誅劉湛等方欲引升後進曄事迹未彰便豫相黜斥萬方將謂卿等不能容才以我為信受讒說但使共知如此不憂大變也曄後謀反伏誅

上嘉其先見國子學建領祭酒二十三年遷尚書右僕射是歲造元武湖上欲於湖中立方丈蓬萊瀛洲三神山尚之固諫乃止時又造華林園並盛暑興役尚之又諫宜加休息上不許曰小人常自曝背此不足為勞時上行幸還多侵夕尚之又表諫上優詔納之先是患貨少鑄四銖錢民間頗盜鑄多翦鑿古錢以取銅上患之二十四年錄尚書江夏王義恭建議以一大錢當兩以防翦鑿議者多同尚之議曰凡創制改法宜順人情未

有違衆矯物而可久也泉布廢興未容驟議前代赤仄白金俄而罷息六貨憤亂人泣於市良由事不畫一難用遵行自非急病權時宜守長世之業若今制遂行富人之貲自倍貧者彌增其困懼非所以欲均之意中領軍沈演之等以為龜貝行於上古泉刀興自有周皆所以阜財通利實國富民者也歷代雖遠資用彌便若以一大錢當兩則國傳難朽之寶家畜一倍增之利不俟加憲巧源自絕上從演之議遂以一錢當兩行之經時公

私非便乃罷二十八年遷尚書令領太子詹事二十九  
年致仕於方山著退居賦以明所守或謂尚之不能固  
志文帝與江夏王義恭詔曰羊孟尚不得告謝尚之任  
遇有殊便當未宜申許尚之遂還攝職羊即羊元保孟  
即孟顗尚之既任事上待之愈隆於是袁淑乃錄古來  
隱士有迹無名者為真隱傳以嗤焉時復遣軍北侵資  
給戎旅悉以委之元凶弒立進位司空尚書令時三方  
興義將佐家在都邑幼悉欲誅之尚之誘說百端並得

免孝武即位復為尚書令丞相南郡王義宣車騎將軍  
臧質反義宣司馬竺超民質長史陸展兄弟並應從誅  
尚之上言於法為重於是坐者並得原時欲分荊州置  
郢州議其所居江夏王義恭蕭思話以為宜在巴陵尚  
之議曰夏口在荊州之中正對沔口通接雍梁實為津  
要於事為允上從其議荊揚二州戶口居江南之半江  
左以來揚州為根本委荊州以閭外至是並欲分之以  
削臣下之權而荆揚並因此虛耗尚之建言宜復合二

州上不許大明二年以為左光祿大夫開府儀同三司  
侍中如故尚之在家常著鹿皮帽及拜開府天子臨軒  
百僚陪位沈慶之於殿庭戲之曰今日何不著鹿皮冠  
慶之累辭爵命朝廷敦勸甚苦尚之謂曰今主上虛懷  
側席詎宜固辭慶之曰沈公不效何公去而復還也尚  
之有愧色尚之愛尚文義老而不休與太常顏延之少  
相好狎二人並短小尚之常謂延之為獫狁延之目尚之  
為猴同游太子西池延之問路人云吾二人誰似猴路

人指尚之為似延之喜笑路人曰彼似猴耳君乃真猴  
有人嘗求為吏部郎尚之歎曰此敗風俗也官當圖人  
安得圖官延之大笑曰我聞古者官人以身令官人以  
勢彼乃勢之所求子何疑焉所與延之論議往反並傳  
於世尚之立身簡約車服率素妻亡不娶又無姬妾秉  
衡當朝畏遠權柄親戚故舊一無薦舉既以此致怨亦  
以此見稱復以本官領中書令四年薨年七十九追贈  
司空諡曰簡穆公子偃字仲弘元嘉中位太子中庶子

元凶弒立以偃為侍中掌詔誥時尚之為司空尚書令  
偃居門下父子並處權要時為寒心而尚之及偃善攝  
機宜曲得名譽會孝武即位任遇無改歷位侍中領太  
子中庶子時求讜言偃以為宜重農卹本并官省事考  
課以能否增奉以除吏姦責成良守久於其職都督刺  
史宜別其任改領驍騎將軍親遇隆密有加舊臣轉吏  
部尚書尚之去選未五載偃復襲其迹世以為榮侍中  
顏竣至是始貴與偃俱在門下以文義賞會相得甚歡



竣既任遇隆密謂宜居重大而位次與偃等未殊意稍  
不悅及偃代竣領選竣逾憤懣與偃遂隙竣時權傾朝  
野偃不自安遂發悸病意慮乖僻上表解職告醫不仕  
孝武遇偃既深備加醫療乃得差偃素好談玄注莊子  
逍遙篇傳於時卒官孝武與顏竣詔甚傷惜之謚曰靖  
子戢事在後史

張裕字茂度吳郡吳人也名與武帝諱同故以字稱曾  
祖澄晉光祿大夫祖彭祖廣州刺史父敞侍御史度支

尚書吳國內史茂度仕為武帝太尉主簿揚州中從事

累遷別駕武帝西伐劉毅北伐關洛皆居守留任州事

出為都督廣州刺史平越中郎將綏靜百越嶺外安之

元嘉元年為侍中都督益州刺史帝討荊州刺史謝晦

詔益州遣軍襲江陵晦平西軍始至白帝茂度與晦素

善議者疑其出軍遲留弟邵時為湘州刺史起兵應大

駕上以邵誠節故不加罪累遷太常以脚疾出為義興

太守上從容謂曰勿以西蜀介懷對曰臣不遭陛下之

明墓木拱矣後為都官尚書以疾就拜光祿大夫加金章紫綬茂度內足於財自絕人事經始本縣之華山為居止優游野澤如此者七年十八年除會稽太守素有吏能職事甚理卒於官諡曰恭子演位太子中舍人演有四弟鏡永辯岱俱知名時謂之張氏五龍鏡少與光祿大夫顏延之隣居顏談議飲酒喧呼不絕而鏡靜嘿無言聲後鏡與客談延之從籬邊聞之取胡牀坐聽辭義清玄延之心服謂客曰彼有人焉由是不復酣呌仕

至新安太守演鏡兄弟中名最高餘並不及初裕曾祖  
登當葬父郭璞為占墓地曰葬某處年過百歲位至三  
司而子孫不蕃某處年幾減半位纔卿校而累世貴顯  
澄乃葬其劣處位至光祿卿年六十四而亡其子孫遂  
昌云永字景雲初為郡主簿累遷尚書中兵郎先是尚  
書中條制繁雜元嘉十八年欲加修撰徙永為刪定郎  
掌其任二十二年除建康令所居皆有稱績又除廣陵  
王誕北中郎錄事參軍永涉獵書史能為文章善隸書

騎射雜藝觸類兼善又有巧思益為文帝所知紙墨皆自營造上每得永表啓輒執玩咨嗟自歎供御者了不及也二十三年造華林園元武湖並使永監統凡所制置皆受則於永永既有才能每盡心力文帝謂堪為將二十九年以永為揚威將軍冀州刺史加都督王元謨申坦等諸將經畧河南進攻碣磝累旬不拔為魏軍所殺甚衆永即夜撤圍退軍不報告諸將衆軍驚擾為魏所乘死敗塗地永及申坦並為統府撫軍將軍蕭思話

所收繫於歷城獄文帝以屢征無功諸將不可任詔責永等與思話又與江夏王義恭書曰早知諸將軍如此恨不以白刃驅之今者悔何所及三十年元凶弒立起永為青州刺史及司空南譙王義宣起義又改永為冀州刺史加都督永遣司馬崔勲之中兵參軍劉宣則二軍馳赴國難時蕭思話在彭城義宣慮二人不相諧緝與思話書勸與永坦懷又使永從兄長史張暢與永書勗之使遠慕廉蔭在公之德近效平勃亡私之美事平

召為江夏王義恭大司馬從事中郎領中兵孝武帝建  
元二年臧質反遣永輔武昌王渾鎮京口大明三年累  
遷廷尉上謂曰卿既與釋之同姓欲使天下無復冤人  
永曉音律太極殿前鐘聲頗嘶孝武嘗以問永永答鐘  
有銅滓乃扣鐘求其處鑿而去之聲遂清越明帝即位  
為青冀二州刺史監四州諸軍事統諸將討徐州刺史  
薛安都累戰克捷破薛索兒又遷鎮軍將軍尋為南兗  
州刺史時薛安都據彭城請降而誠心不款明帝遣永

與沈攸之以重兵迎之加都督前鋒諸軍事進軍彭城  
安都招引魏兵既至永狼狽引軍還為魏軍所追大敗  
復遇寒雪士卒離散永脚指斷落僅以身免失其第四  
子三年徙會稽太守加都督將軍如故以北行失律因  
求自貶降號左將軍永痛悼所失之子有燕常哀服制  
雖除猶立靈坐飲食衣服待之如生每出行常別具名  
車好馬號曰侍從有軍事輒語左右報郎君知也以破  
薛索免功封孝昌縣侯在會稽賓客有謝方童阮須何



達之等竊其權賊貨盈積方童等下獄死永又降號冠  
軍將軍廢帝即位為右光祿大夫侍中領安成王師出  
為吳郡太守元徽二年為征北將軍南兗州刺史加都  
督永少便驅馳志在宣力其為將帥能與士卒同甘苦  
朝廷所給賜脯餼必恭坐齊割手自頒賜年雖已老志  
氣未衰優游閑任意甚不樂及有此授喜悅非常即日  
命駕還都未之鎮遇桂陽王休範作亂永率所領屯白  
下休範至新亭前鋒攻南掖門永遣人覘賊既反唱言

臺城已陷永衆遂潰棄軍而還以舊臣不加罪止免官  
削爵以愧發病而卒弟岱子瓌稷齊梁史各有傳

張邵字茂宗會稽太守裕之弟也初為晉琅瑯內史王  
誕龍驤府功曹桓玄徙誕於廣州親故皆離棄之唯邵  
情禮彌謹流涕追送時寇亂年饑邵又資饋其妻子桓  
玄篡位父敬先為尚書以答事徵謬降為廷尉卿及武  
帝討桓玄邵白敬王府君被徙大人左遷君親之耻志  
存雪報今義兵起宜表獻忠款敬從之武帝大悅命書

寺門曰有犯張廷尉家者以軍法論事平以敬為吳郡  
太守及王謚為揚州召邵補主簿謚薨武帝代為揚州  
復以邵為主簿劉毅位居亞相好士愛才當世莫不輻  
湊唯邵不往親故怪而問之邵曰主公命世人傑何煩  
多問劉穆之白於武帝帝益親之轉太尉參軍署長流  
賊曹盧循至蔡洲武帝至石頭使邵守南城時百姓水  
際望賊帝不解其意以問邵邵曰節鉞未反奔散之不  
暇亦何暇觀望今當無復恐耳帝以邵勤練憂公重補

州主簿悉心政事精力絕人及誅劉藩郤時在西州直  
廬即夜誡衆曹曰大軍當大討可各條倉庫及舟船遣  
人領之至曉取辦旦日帝求諸簿最應時即至怪問其  
速諸曹答曰宿受張主簿處分帝曰張郤可謂同人憂  
慮矣九年世子始開征虜府以郤補錄事參軍轉號中  
軍遷諮議參軍領記室十二年武帝北伐郤請見曰人  
生危脆宜有遠慮若劉穆之邂逅不幸誰可代之尊業  
如此若有不諱則處分云何帝曰此自委穆之與卿耳

青州刺史檀祗鎮廣陵輒率衆至滁中掩討亡命劉穆之慮其為變議欲遣軍邵曰檀韶據中流道濟為軍首若有相疑之跡則大府立危不如逆遣慰勞必無患也韶果不動及穆之暴卒朝廷悚懼便欲發詔以司馬徐羨之代之邵獨曰今誠急病任終在徐然世子無專行之義宜須諮上信反方便世子出命曰朝廷及大府事悉諮徐司馬其餘啓還武帝善其臨事不撓得大臣節十四年世子改授荊州邵諫曰儲貳之重四海所繫不

宜外出敢以死請世子竟不行文帝為中郎將荊州刺史以邵為司馬領南郡相衆事悉決於邵武帝受命以佐命功封臨沮伯分荊州立湘州以為刺史將署府僚邵以長沙內地非用武之國置府妨人乖為政之要從之荊州刺史謝晦反遺書要邵邵不發函使呈文帝元嘉五年遷征虜將軍領寧蠻校尉雍州刺史加都督初王華與邵不和及華參權要親舊為之危心邵曰子陵方弘至公豈以私隙害正義是任也華實舉之及至襄

陽築長圍修立堤堰創田數千頃公私充給丹浙二州  
蠻屢屬為寇邵誘其帥並出因大會誅之遣軍掩其村  
落悉擒之既失信羣蠻所在並起水陸路斷七年子敷  
至襄陽定省當還都羣蠻欲斷取之會蠕蠕國貢獻使  
至蠻以為是敷因掠之邵坐此降號揚烈將軍江夏王  
義恭鎮江陵以邵為撫軍長史持節南蠻校尉九年坐  
在雍州營私蓄取贓貨二百四十五萬下廷尉免官削  
爵土後為吳興太守卒追復爵邑諡曰簡伯邵臨終遺

命祭以菜果葦席為轎車諸子從焉長子敷字景允生而母亡年數歲問知之雖童蒙便有感慕之色至十歲許求母遺物而散施已盡唯得一扇乃緘鑲之每至感思輒開筭流涕見從母悲感哽咽性整貴風韻甚高好讀玄言兼屬文論父邵使與高士南陽宗少文談繫象往復數番少文每屈握麈尾歎曰吾道東矣於是名價日重武帝聞其美名見奇之曰真千里駒也以為世子中軍參軍數見接引累遷江夏王義恭記室參軍義恭



就文帝求一學義沙門會敷赴假還江陵入辭文帝令以後車載沙門往謂曰道中可得言晤敷不奉詔曰臣性不耐雜上甚不悅遷正員中書郎敷小名櫛父郤小名梨文帝戲之曰櫛何如梨答曰梨是百果之宗櫛何敢比也中書舍人狄當周赴並管要務以敷同省名家欲詣之赴曰彼若不相容接便不如勿往詎可輕行當曰吾等並正員外郎矣何憂不得共坐敷先傍設二牀去壁三四尺二客就席敷數呼左右曰移我遠客赴等

失色而去其自標遇如此善持音儀盡詳緩之致與人  
別執手曰念相聞餘響久之不絕張氏後進皆慕之其  
源起自敷也遷黃門侍郎始興王濬後將軍司徒左長  
史未拜父在吳興亡成服凡十餘日始進水漿葬畢不  
進鹽菜遂毀瘠成疾伯父茂度每止譬之輒更感慟絕  
而復續茂度曰我冀譬汝有益但更甚耳自是不復往  
未期而卒孝武即位詔旌其孝道追贈侍中改其所居  
稱孝張里邵兄禕少有節行為晉琅邪王國郎中令從

王至洛還京都武帝封藥酒一甕付禕使密加酖毒禕  
受命於道自飲而卒在晉忠義傳禕子暢字少微與從  
兄敷演鏡齊名為後進之秀起家為太守徐佩之主簿  
佩之被誅暢馳出奔赴制服盡哀為論者所美弟牧嘗  
為獠犬所傷醫云宜食蝦蟇牧甚難之暢含笑先嘗牧  
因此乃食創亦即愈累遷太子中庶子孝武鎮彭城暢  
為安北長史沛郡太守元嘉二十七年魏太武南征太  
尉江夏王義恭統諸軍出鎮彭城太武親率大衆去彭

城數十里義恭以彭城衆力雖多軍食不足欲棄彭城南歸計議彌日不定時歷城衆少食多安北中兵參軍沈慶之議欲以車營為函箱陳精兵為外翼奉二王及妃媛直趨歷城分城兵配護軍將軍蕭思話留守太尉長史何勗不同欲席卷奔鬱洲自海道還都二議未決更集羣僚謀之暢曰若歷城鬱洲有可至之理下官敢不高讚今城內乏食百姓咸有走情但以關扃嚴固欲去莫從耳若一旦動脚則各自奔散欲至所在何由可

得今軍食雖寡朝夕猶未窘罄豈有捨萬安之術而就危亡之道若此計必行下官請以頸血汙君馬跡孝武謂義恭曰張長史言不可異也義恭乃止魏太武既至乃登城南亞父冢於戲馬臺立氍毹屋先是隊主蒯應見執至晡時太武遣送應至小市門致意求甘蔗及酒孝武遣人送酒二器甘蔗百挺求駱駝明日太武又自上戲馬臺復遣使至小市門求與孝武相見仍遣送駱駝并致雜物使於南門受之暢於城上與魏尚書李孝伯

語孝伯問君何姓答云姓張孝伯曰是張長史邪暢曰  
君何得見識孝伯曰君聲名遠聞足使我知因言說久  
之城內有具思者嘗在魏義恭遣視知是孝伯乃開門  
進餉物太武又求酒及甘橘暢宣孝武旨又致螺盃雜  
物南土所珍太武復令孝伯傳語曰魏主有詔借博具  
暢曰博具當為申致有詔之言政可施於彼國孝伯曰  
隣國之君何得不稱詔於隣國之臣暢曰君之此稱尚  
不可聞於中華況在諸王之貴而獨曰隣國之君邪孝

伯曰魏主言太尉鎮軍久闕南信殊當憂邑若欲遣信當為護送暢曰此方間路甚多不復以此勞魏主孝伯曰亦知有水路似為白賊所斷暢曰君著白衣故稱白賊邪孝伯大笑曰今之白賊亦不異黃巾赤眉暢曰黃巾赤眉似不在江南孝伯曰亦不離青徐暢曰今者青徐實為有賊但非白賊耳又求博具俄送與太武又遣送糴及九種鹽并胡豉云此諸鹽各有所宜白鹽是魏主所食黑者療腹脹氣滿細刮取六銖以酒服之胡鹽

療目痛柔鹽不用食唯療馬脊瘡赤鹽駁鹽臭鹽馬齒  
鹽四種並不中食胡豉亦中噉又求黃甘并云魏主致  
意安北何不遣人來至我間彼此之情雖不可盡要須  
見我小大知我老少觀我為人若諸佐不可遣亦可使  
僮來暢又宣旨答曰魏主形狀才力久為來往所見李  
尚書親自銜命不患彼此不盡故不復遣信又云魏主  
恨向所送馬殊不稱意安北若須大馬當更送之脫須  
蜀馬亦有佳者暢曰安北不乏良駟送自彼意非此所



求義恭又餉炬燭十挺孝武亦致錦一疋又曰知更須  
黃甘誠非所吝但會不足周彼一軍向給魏主未應便  
乏故不復重付太武復求甘蔗安石榴暢曰石榴出自  
鄴下亦當非彼所乏孝伯曰君南土膏粱何為著屨君  
而著此使諸將士云何暢曰膏粱之言誠為多愧但以  
不武受命統軍戎旅之間不容緩服太武又遣就二王  
借箜篌琵琶箏笛等器及棊子孝伯辭辯亦北土之美  
暢隨宜應答吐屬如流音韻詳雅風儀華潤孝伯及左

右人並相視歎息時魏聲云當出襄陽故以暢為南譙  
王義宣司空長史南郡太守三十年元凶弑逆義宣發  
哀之日即便舉兵暢為元佐位居僚首哀容俯仰蔭映  
當時舉哀畢改服著黃袴褶出射堂簡人音姿容止莫  
不矚目見者皆願為盡命事平徵為吏部尚書封夷道  
縣侯義宣既有異圖蔡超等以暢人望勸義宣留之乃  
解南蠻校尉以授暢加冠軍將軍領丞相長史暢遣門  
生荀僧寶下都因顏竣陳義宣釁狀僧寶有私貨停巴

陵不時下會義宣起兵津路斷絕僧寶遂不得達義宣  
將為逆遣嬖人翟靈寶告暢暢陳必無此理請以死保  
之靈寶知暢不回勸義宣殺之以徇衆賴丞相司馬竺  
超民得免進號撫軍別立軍部以收人望暢雖署文檄  
而飲酒常醉不省文書隨義宣東下梁山戰敗於亂兵  
自歸為軍人所掠衣服都盡遇右軍王元謨乘輿出營  
暢已得敗衣因排元謨上輿元謨意甚不悅諸將請殺  
之隊主張世營救得免執送京都下廷尉尋見原起為

都官尚書轉侍中代子淹領太子右衛率孝武宴朝賢  
暢亦在坐何偃因醉曰張暢固是奇才同義宣作賊亦  
能無咎非才何以致此暢乃厲聲曰太初之時誰黃其  
閤帝曰何事相苦初元凶弑逆偃父尚之為元凶司空  
義師至新林門生皆逃尚之父子與婢妾共洗黃閤故  
暢譏之孝建二年出為會稽太守卒謚曰宣暢愛弟子  
輯臨終遺命與輯合墳論者非之暢弟悅亦有美稱歷  
侍中臨海王子項前軍長史南郡太守晉安王子勛建

偽號召拜為吏部尚書與鄧琬共輔偽政事敗悅殺琬  
歸降復為太子中庶子後拜雍州刺史泰始六年明帝  
於巴郡置三巴校尉以悅補之加持節輔師將軍領巴  
郡太守未拜卒暢子浩官至義陽王昶征北諮議參軍  
浩弟淹黃門郎封廣晉縣子太子左衛率為東陽太守  
逼郡吏燒臂照佛百姓有罪使禮佛贖愆動至數千拜  
坐免官禁錮起為光祿勳臨川內史後與晉安王子勛  
同逆軍敗見殺淹弟融齊史有傳

范泰字伯倫順陽人也祖汪晉安北將軍徐兗二州刺史父寧豫章太守並知名前代泰初為太學博士荊州刺史王忱泰外弟也請為天門太守忱嗜酒醉輒累旬及醒則儼然端肅泰謂忱曰酒雖會性亦所以傷生遊處以來常欲有以相戒當卿沈湎措言莫由及今之遇又無假陳說忱嗟歎久之曰見規者衆矣未有若此者也或問忱范泰何如謝邈忱曰茂度漫又問何如殷覲忱曰伯道易忱常有意立功謂泰曰今城池既立軍甲

亦充將欲埽除中原以申宿昔之志伯道意銳當令擁  
戈前驅以君持重欲將委留事何如泰曰百年逋寇前  
賢挫屈者多矣功名雖貴鄙生所不敢謀會忱病卒召  
泰為驃騎諮議參軍遷中書郎時會稽世子元顯專權  
內外百官請假不復表聞唯籤元顯而已泰言以為非  
宜元顯不納以父憂去職襲爵遂鄉侯桓玄輔政使御  
史中丞祖台之奏泰及前司徒左長史王准之輔國將  
軍司馬珣之並居喪無禮泰坐廢徙丹徒武帝義旗建

累遷黃門侍郎御史中丞坐議殷祠事謬白衣領職出  
為東陽太守歷侍中度支尚書時僕射陳郡謝混後進  
知名武帝嘗問混泰名輩誰比對曰王元太一流人也  
徙為太常初司徒道規無子養文帝及道規薨以兄道  
憐第二子義慶為嗣武帝以道規素愛文帝又令居重  
及道規追封南郡公應以先封華容縣公賜文帝泰議  
以為禮無二主由是文帝還本屬後加散騎常侍為尚  
書兼司空與右僕射袁湛授宋公九錫隨軍到洛陽武



帝還彭城與其登城泰有足疾特命乘輿泰好酒不拘  
小節通率任心雖在公坐言笑不異私室武帝甚賞愛  
之然慢於為治故不得在政事之官後武帝受命議建  
國學以泰領國子祭酒泰上表陳獎進之道時學竟不  
立又言事者多以錢貨減少國用不足欲更造五銖泰  
又諫曰臣聞為國拯弊莫若務本百姓不足君孰與足  
未有民貧而國富本不足而末有餘者也故囊漏貯中  
識者不吝反裘負薪存毛實難王者不言有無諸侯不

說多少食祿之家不與百姓爭利拔葵所以明政織蒲  
謂之不仁是以貴賤有章職分無爽今之所憂在農人  
尚寡倉廩未充轉運無已資食者衆家無私積難以禦  
荒耳夫貨有貿易不在少多昔日之貴今者之賤彼此  
共之其揆一也但令官民均通則無患不足若使必資  
貨廣以收國用者則龜貝之屬自古所行尋銅之為器  
在用也博矣鍾律所通者遠機衡所揆者大夏鼎負圖  
寶冠衆瑞晉鐸呈象亦啓休徵器有要用則貴賤同資

物有適宜則家國共急今毀必資之器而為無施之錢

於貨則功不補勞在用則君民俱困校之以實損多益少伏願思可久之道除欲速之情弘山海之納擇芻牧之說景平初加特進明年致仕解國子祭酒少帝在位多諸愆失泰上封事極諫少帝雖不能納亦不加譴徐羨之傅亮與泰素不平及廬陵王義真少帝見害泰謂所親曰吾觀古今多矣未有受遺顧託而嗣君見殺賢王嬰戮也元嘉二年泰表賀元正并陳旱災多所獎勸

拜表遂輕舟游東陽任心行止不關朝廷有司劾奏之  
文帝不問時文帝雖當陽親覽萬機而羨之等猶秉重  
權泰復上表論廬陵王得失言及執事諸子禁之表竟  
不奏三年羨之等伏誅進位侍中左光祿大夫國子祭  
酒領江夏王師特進如故上以泰先朝舊臣恩禮甚重  
以有脚疾宴見之日特聽乘輿到坐所陳時事上優從  
之其年秋旱蝗又上表言有蝗之處縣官多課人捕之  
既無益於枯苗復有傷於殺害又女人被宥由來尚矣

謝晦婦女猶繫尚方匹婦怨歎亦能有所感激書奏上  
特原之司徒王弘輔政泰謂弘曰天下務廣而權要難  
居卿兄弟盛滿當深存降挹彭城王帝之次弟宜徵還  
入朝共參政事弘納其言泰博覽篇籍好為文章愛獎  
後生孜孜無倦撰古今善言二十四篇及文集傳於世  
暮年事佛甚精於宅西立祇洹精舍五年卒年七十四  
初贈開府殷景仁曰泰素望不重不可擬議台司竟不  
果及葬王弘撫棺哭曰君平生重殷鐵令以此為報追

贈車騎將軍謚曰宣侯第四子暕最知名暕字蔚宗母如廁產之額為墻所傷故以墻為小字出繼從伯弘之襲封武興縣五等侯少好學博涉經史善為文章能隸書曉音律初為祕書丞父憂去職服闋為彭城王義康參軍轉征南大將軍檀道濟司馬領新蔡太守累遷尚書吏部郎元嘉元年彭城太妃薨將葬祖夕僚故並集東府暕弟廣時為司徒祭酒其日在直暕與司徒左曹屬王深宿廣直夜中酣飲開北牖聽挽歌為樂義康大

怒左遷曄宣城太守不得志乃刪衆家後漢書為一家之作至於屈伸榮辱之際未嘗不致意焉遷長沙王義欣鎮軍長史兄嵩為宜都太守嫡母隨嵩在官母亡報之以疾曄不時奔赴及行又攜妓妾自隨為御史中丞劉損所奏文帝愛其才不罪也服闋累遷左衛將軍太子詹事曄長不滿七尺肥黑禿眉鬢善彈琵琶能為新聲上欲聞之屢諷以微旨曄陽為不曉終不肯為上彈上嘗宴飲歡適謂曄曰我欲歌卿可彈曄乃奉旨上歌

既畢曄亦止絃初魯國孔熙先博學有縱橫才志文史  
星算無不兼善為員外散騎侍郎不為時所知久不得  
調初熙先父默之為廣州刺史以贓賄敗下廷尉大將  
軍彭城王義康保持之得免及義康被黜熙先密懷報  
效欲要朝廷大臣未知誰可動者以曄意志不滿欲引  
之而素不為曄所知乃傾身事曄外甥謝綜綜雅為曄  
所知熙先籍嶺南遺財家甚富足始與綜諸弟共博故  
為拙行以物輸之由此情意稍款綜又引熙先與曄戲



熙先故為不敵前後輸曄物甚多曄既利其財寶又愛其文藝遂相與申莫逆之好熙先始以微言動曄曄不回熙先乃極辭譬說曄素有閨庭論議朝野所知故門胄雖華而國家不與姻娶熙先因此激之曰丈人若謂朝廷相待厚者何故不與丈人婚為是門戶不得邪人作犬豕相遇而丈人欲為之死不亦惑乎曄默然不答其意乃定時曄方與沈演之並為上所知待每被見多同曄若先至必待演之俱入演之先至常獨被見曄又

以此為怨。曄累經義康府佐，見待素厚。及宣城之授，意好乖離。綜為義康大將軍記室參軍，隨鎮豫章。綜還申義康意於曄，求解晚隙，復敦往好。曄既有逆謀，欲探時旨，乃言於上曰：「臣歷觀前史，二漢故事，諸蕃王政以妖詛幸災，便正大逆之罰。況義康奸心，釁跡彰著，遐邇而至今，無恙臣竊惑焉。且大梗常存，將成亂階，上不納熙先素善。天文云上，必以非道晏駕。當由骨肉相殘，江州應出天子。以為義康當之。綜父述亦為義康所遇。綜弟

約又是義康女夫故文帝使綜隨從南上既為熙先獎說亦有酬報之心廣州人周靈甫有家兵部曲熙先以六十萬錢與之使於廣州合兵靈甫一去不反大將軍府史仲承祖義康舊所信念屢銜命下都亦潛結腹心規有異志聞熙先有誠密相結納丹陽尹徐湛之素為義康所愛雖為舅甥恩過子弟承祖因此結事湛之告以密計承祖南下申義康意於蕭思話及曄云本欲與蕭結婚恨始意不果與范本情不薄中間相失傍人為

之耳有法畧道人先為義康所養粗被知待又有王國

寺尼法靜出入義康家內皆感舊恩規相拯拔並與熙

先往來使法畧罷道法畧本姓孫改名景元以為臧質

寧遠參軍熙先善療病兼能診脉法靜尼妹夫許耀領

隊在臺宿衛殿省嘗有疾因法靜尼就熙先乞療得損

因成周旋熙先以耀膽幹因告逆謀耀許為內應豫章

胡藩子遵世與法靜甚款亦密相酬和法靜尼南上熙

先遣婢采藻隨之付以牋書陳說圖讖法靜還義康餉

熙先銅匕銅鑷袍段碁奩等物熙先慮事泄酖采藻殺之湛之又謂曄等臧質見與異常質與蕭思話款密二人並受大將軍眷遇必無異同不憂兵力不足但當勿失機耳乃備相署置湛之為撫軍將軍揚州刺史曄中軍將軍南徐州刺史熙先左衛將軍其餘皆有選擬凡素所不善及不附義康者則有別簿並入死目熙先使弟休先為檄文言賊臣趙伯符肆兵犯蹕毒流諸宰乃奉皇帝號於義康熙先以為大事宜須義康意旨曄乃

詐作義康與湛之書宣示同黨具陳禍福二十二年九月征北將軍衡陽王義季右將軍南平王鐔出鎮上於武帳岡祖道曄等期以其日為亂許耀侍上叩刀以目曄曄不敢視俄而坐散差互不得發十一月徐湛之乃上表言狀於是悉出檄書選事及同惡人名手迹其夜上先呼曄及朝臣集華林東閣止於客省先已於外收綜及熙先兄弟並皆款服于時上在延賢堂遣使問曄曰以卿擁有文翰故相任擢亦知卿意難厭滿正是無

理怨望驅扇朋黨而已云何乃與謝綜徐湛之孔熙先  
謀逆曄曰古人言左手握天下之圖右手刎其喉愚夫  
不為以理而察臣不容有此熙先苟誣引臣耳熙先聞  
曄不服笑謂殿中將軍沈邵之曰凡諸處分符檄書疏  
皆曄所造及改定云何方作此抵上示以曄墨迹曄乃  
服明日仗士送曄付廷尉入獄然後知為湛之所發熙  
先望風吐款辭氣不撓上奇其才遣人慰勉之曰以卿  
之才而滯於集書省理應有異志此乃我負卿也熙先

於獄中上書陳謝并別陳天文占候誠上有骨肉相殘之禍其言深切曄後與謝綜等得隔壁遙問綜曰疑誰所告綜曰不知曄乃稱徐湛之小名曰乃是徐僮也在獄為詩曰禍福本無兆性命歸有極必至定前期誰能延一息在生已可知來緣儘無識好醜共一丘何足異枉直豈論東陵上寧辯首山側雖無嵇生琴庶同夏侯色寄言生存子此路行復即上有白團扇甚佳送曄令書出詩賦美句曄受旨援筆而書曰去白日之焰焰襲



長夜之悠悠上循覽悽然曄本謂入獄便死而上窮其

獄遂經二旬曄便有生望獄吏因戲之曰外傳詹事或

當長繫曄聞之驚喜綜熙先笑之曰詹事嘗昔論事無

不攘袂瞋目及在西池射堂上躍馬顧眄自以為一世

之雄而今擾攘紛紜畏死乃爾設令今時賜以性命人

臣圖生何顏可以生存曄謂衛獄將曰惜哉藐如此人

將曰不忠之人亦何足惜曄曰大將言是也及將詣市

曄最在前於獄門顧謂綜曰次第當以位邪綜曰賊帥

當為先在道語笑初無慙耻至市問綜曰時欲至未綜  
曰勢不復久曄既食又告勸綜綜曰此異疾篤何事強  
飯曄家人悉至市監刑職司問曰須相見不曄問綜曰  
家人已來幸得相見將不暫別綜曰別與不別亦何所  
在來必當號泣正足亂人意曄曰號泣何關人向見道  
邊親故相瞻望吾意故欲相見於是呼前曄妻先撫其  
子回罵曄曰君不為百歲阿家不感天子恩遇身死固  
不足塞罪奈何枉殺子孫曄乾笑云罪至而已曄所生

母對曰主上念汝無極汝曾不能感恩又不念我老今日奈何仍以手擊曄頸及頰曄妻云罪人阿家莫憶莫念妹及妓妾來別曄乃悲泣流漣綜曰舅殊不及夏侯色曄收淚而已綜母以子弟自陷逆亂獨不出視曄語綜曰姊今不來勝人多也曄轉醉子藹亦醉取地土及果皮以擲曄呼為別駕數十聲曄問曰汝瞋我邪藹曰今日何緣復瞋但父子同死不能不悲耳曄常謂死為滅欲著無鬼論至是與徐湛之書言當相訟於地下其

謬亂如此臨刑又語人曰寄語何僕射天下決無佛鬼  
若有靈自當相報收曄家樂器服玩並皆珍麗妓妾皆  
盛飾母住止單陋唯有一厨盛樵薪弟子冬無被叔父  
單布衣曄及黨與並伏誅曄時年四十八謝綜弟緯徙  
廣州藹子魯連吳興昭公主外孫請全生命亦得遠徙  
孝武即位乃還曄性精微有思致觸類多善衣裳器服  
莫不增損制度世人皆法學之撰和香方其序之曰麝  
本多忌過分必害沉實易和盈斤無傷零藿虛燥詹唐

黏濕甘松蘇合安息鬱金柰多和羅之屬並被珍於外  
國無取於中土又棗膏昏鈍甲煎淺俗非為無助於馨  
烈乃當彌增於尤疾也此序所言悉以比類朝士庸本  
多忌比庾仲文零藿虛燥比何尚之詹唐黏濕比沈演  
之棗膏昏鈍比羊元保甲煎淺俗比徐湛之甘松蘇合  
比惠琳道人沉實易和以自比也睦獄中與諸甥姪書  
以自序其畧曰吾少嬾學問年三十許始有向耳自爾  
以來轉為心化至於所通處皆自得之胸懷常謂情忘

所記故當以意為主以文傳意以意為主則其旨必見以文傳意則其辭不流然後抽其芬芳振其金石耳觀古今文人多不全了此處年少中謝莊最有其分手筆差易於文不拘韻故也吾思乃無定方但多公家之言少於事外遠致以此為恨亦由無意於文名故也吾始觀史書政嘗覺其可不解耳既造後漢轉得統緒詳觀古今著述及評論殆少可意者班氏最有高名既任情無例不可甲乙博瞻不可及之整理未必愧也吾雜傳

論皆有精意深旨至於循吏以下及六吏諸序論筆勢縱放實天下之奇作其中合者往往不減過秦篇嘗共比方班氏所作非但不愧之而已欲徧作諸贊前漢所有者悉令備雖事不必多且使見文得盡又欲因事就卷內發論以正一代之得失意復不果贊自是吾文傑思殆無一字空設奇變不窮同合異體乃自不知所以稱之此書行故應有賞音者紀傳例為舉其大畧耳諸細意甚多自古體大而思精未有此也恐世人不能盡

之多貴古賤今所以稱情狂言耳吾於音樂聽功不及  
自揮但所精非雅聲為可恨然至於一絕處亦復何異  
邪其中體趣言之不可盡絃外之意虛響之音不知所  
從而來亦嘗以授人士庶中未有一豪似者此事永不  
傳矣吾書雖小小有意筆勢不快餘竟不成就每愧此  
名曄自序並實故存之藹幼而整潔衣服竟歲未嘗有  
塵點死時年二十曄少時兄晏常云此兒進利終破門  
戶果如其言初何尚之處銓衡自謂天下無滯才及熙



先就拘帝諮尚之曰使孔熙先年三十猶作散騎侍郎  
那不作賊熙先死後又謂尚之曰孔熙先有美才地胄  
猶可論而賢迹仕流豈非時匠失乎尚之曰臣昔謬得  
待罪選曹誠無以濯汙揚清然君子之有智能猶鸞鳳  
之有文采俟時而振羽翼何患不出雲霞之上若熙先  
必蘊文采自棄於汙泥終無論矣上曰昔有良材而不  
遇知己者何嘗不遺恨於後哉

荀伯子潁川潁陰人也祖羨晉驃騎將軍父猗祕書郎

伯子少好學博覽經傳而通率好為雜語遨遊閭里故  
以此失清塗解褐為駙馬都尉奉朝請員外散騎侍郎  
著作郎徐廣重其才學舉伯子及王韶之並為佐郎同  
撰晉史及著桓玄等傳遷尚書祠部郎義熙元年上表  
稱故太傅鉅平侯羊祜勲參佐命功盛平吳而享嗣闕  
然蒸嘗莫寄漢以蕭何元功故絕世輒紹愚謂鉅平之  
封宜同鄴國故太尉廣陵公陳淮黨翼孫秀禍加淮南  
竊饗大國因罪為利會西朝政刑失裁中興亦因而不

奪令王道惟新豈可不大判臧否愚謂廣陵之國宜在  
削除故太保衛瓘本爵菑陽縣公既被橫禍乃進第秩  
加贈蘭陵又轉江夏中朝公輔多非理終瓘功德不殊  
亦無緣獨受偏賞宜復本封以正國章詔付門下前散  
騎常侍江夏公衛瓘及潁川陳茂先各自陳先代勲閥  
不伏貶降詔皆付門下並不施行伯子為妻弟謝晦薦  
達入為尚書左丞出補臨川內史車騎將軍王弘稱伯  
子沈重不華有平陽侯之風伯子常自矜藉廕之美謂

弘曰天下膏粱唯使君與下官耳宣明之徒不足數也  
遷散騎常侍本邑大中正又上表曰伏見百官位次陳  
留王在零陵王上臣愚切以為疑昔武王克殷封神農  
之後於焦黃帝之後於祝帝堯之後於藟帝舜之後於  
陳夏之後於杞殷之後於宋杞宋陳並為列國而藟祝  
焦無聞焉斯則褒崇所承優於遠代之顯驗也是以春  
秋次序諸侯宋居杞陳之上考之近代事亦有徵晉泰  
始元年詔山陽公劉康子弟一人爵關內侯衛公姬署

宋侯孔紹子弟一人駙馬都尉又泰始三年太常上言  
博士劉嘉等稱衛公署於大晉在三恪之數應降稱侯  
臣以為零陵王位宜在陳留之上從之遷御史中丞涖  
職勤恪有匪躬之稱立朝正色衆咸憚之凡所奏劾莫  
不深相訶毀或延及祖禰示其切直又頗雜嘲戲故世  
人以此非之補司徒左長史出為東陽太守卒文集傳  
於世子赤松為尚書右丞以徐湛之黨為元凶所殺伯  
子族弟昶字茂祖與伯子絕服元嘉中以文義至中書

郎昶子萬秋字元寶亦用才學自顯昶見釋慧琳謂曰  
昨萬秋對策欲以相示答曰此不須看若非先見而答  
貧道不能為若先見而答貧道奴亦能為昶曰此將不  
傷道德邪答曰大德所以不德乃相對而笑竟不看焉  
萬秋孝武初為晉陵太守坐於郡立華林閣置主衣主  
書下獄免前廢帝末為御史中丞卒官

徐廣字野民東莞姑幕人也父藻都水使者兄邈太子  
前衛率家世好學至廣尤精百家數術無不研覽家貧

未嘗以產業為意妻中山劉謚之女忿之數以相讓廣終不改如此十餘年家道日弊遂與廣離後晉孝武帝以廣博學除為祕書郎校書祕閣增置職僚隆安中尚書令王珣舉為祠部郎李太后崩廣議服曰太皇太后名位既正體同皇極理制備盡情禮彌申陽秋之義母以子貴既稱夫人禮服從正故成風顯夫人之號僖公服三年之喪子於父之所生體尊義重且禮祖不厭孫固宜遂服無屈而緣情立制若嫌明文不存則疑斯從

重謂應同於為祖母後齊衰三年時從其議及會稽王世子元顯錄尚書欲使百僚致敬臺內使廣立議由是內外並執下官禮廣常為愧恨義熙初武帝使撰車服儀注仍除鎮軍諮議參軍領記室封樂城縣五等侯轉員外散騎常侍領著作郎二年尚書奏廣撰成晉史六年遷驍騎將軍時有風電為災廣獻言武帝多所勸免又轉大司農領著作郎遷祕書監初桓玄篡位安帝出宮廣陪列悲慟哀動左右及武帝受禪恭帝遜位廣又



哀感涕泗交流謝晦見之謂曰徐公將無小過廣收淚  
答曰身與君不同君佐命興王逢千載嘉運身世荷晉  
德眷戀故主因更歔歔永初元年詔除中散大夫廣言  
墳墓在晉陵丹徒又生長京口而息道元忝宰此邑乞  
隨之官歸終桑梓許之贈賜甚厚性好讀書年過八十  
猶歲讀五經一遍元嘉二年卒廣所撰晉紀四十二卷  
義熙十二年成表上之又有答禮問百餘條行於世時  
有高平郗紹亦作晉中興書數以示何法盛法盛有意

圖之謂紹曰卿名位貴達不復俟此延譽我寒士無聞  
於時如袁宏干寶之徒賴有著述流聲於後宜以為惠  
紹不與至書成在齋內厨中法盛詣紹紹不在直入竊  
書紹還失之無復兼本於是遂行何書廣兄邈晉太子  
前衛率邈子豁字萬同永嘉初為尚書左丞山陰令精  
練法理為時所推元嘉初為始興太守表陳三事文帝  
嘉之賜絹二百疋穀千斛徙廣州刺史未拜而卒

鄭鮮之字道子滎陽開封人也高祖渾魏將作大匠祖

襲晉大司農襲經為江乘令因居縣境父遵尚書郎鮮  
之下帷讀書絕交遊初為桓偉輔國主簿先是兗州刺  
史滕恬為丁零翟所沒屍喪不反恬子羨仕宦不廢論  
者嫌之桓玄在荊州使羣僚博議鮮之議曰名教大極  
忠孝而已至乎變通抑引每事輒殊本而尋之皆求心  
而遺迹迹之所乘遭遇或異故聖人或就迹以助教或  
因迹以成罪屈伸與奪難可等齊舉其阡陌皆可畧言  
矣天可逃乎而伊尹廢君君可脅乎而鬻拳見善忠可

愚乎而箕子同仁自此以還殊實而齊聲異譽而等美者不可勝言今如滕羨情事者或終身隱處不關人事或升朝理務無譏前哲通滕者則以無譏為證塞滕者則以隱處為美折其兩中則異同之情可見矣夫聖人立教猶言有禮無時君子不行有禮無時政以事有通變不可守一故耳若王陵之母見烹於楚陵不退身窮居終為社稷之臣非為榮也鮑勛謬魏朝亡身為效觀其志非貪爵也漢魏以來記闕其典尋而得者無有

幾人至于大晉中朝及中興之後楊臻則七年不除喪三十餘年不關人事溫公則見逼於王命庾中丞則終身不著恰高世遠則為王右軍何驃騎所勸割文皇帝以東關之役尸骸不反者制其子弟不廢婚宦永嘉之後王敦復申東關之制此自以法奪情即是東關永嘉之諭也而雜以情譏宜在貶裁耳及武帝起義兵累遷御史中丞性勁正不阿彊貴明憲直繩甚得司直之體外甥劉毅權重當時朝野莫不歸附之鮮之盡心武帝

獨不屈意於毅毅甚恨焉以與毅舅甥制不相糾使治書  
侍御史丘洹奏彈毅帝輒宥毅使傳詔羅道盛詔無所  
問時新制長吏以父母疾去官禁錮三年山陰令沈叔任  
父疾去職鮮之因此上議曰父母之疾而加以罪名悖  
義違理莫此為大謂宜從舊於義為允從之於是自二  
品以上父母及為祖父母後者墳墓崩毀及疾病族屬  
輒去職並不禁錮劉毅當鎮江陵武帝會於江寧朝士  
畢集毅素好撝撻於是會戲武帝與毅斂局各得其半

積錢隱人殺呼帝併之殺先擲得雉帝甚不悅良久乃  
答之四座傾屬既擲得盧殺意大惡謂帝曰知公不以  
大坐席與人鮮之大悅徒跣繞牀大叫聲聲相續殺甚  
不平謂之曰此鄭君何為者無復舅甥之敬武帝少事  
戎旅不經涉學及為宰相頗慕風流時或談論人皆依  
違不敢難鮮之難必切至未嘗寬假要須帝辭窮理屈  
然後置之帝或時有慙恚色既而謂人曰我本無術學  
談義尤淺比時言論諸賢多見容寬唯鄭不爾獨能盡

人意甚以此感之時人謂為格佞十二年武帝北伐以  
為右長史鮮之曾祖江州長史哲墓在開封相去三百  
里乞求拜省帝以騎送之及入咸陽帝遍視阿房未央  
故地悽愴動容問鮮之秦漢所以得喪鮮之具以賈誼  
過秦對帝曰及子嬰而亡已為晚矣然觀始皇為人智  
足見是非所任不得人何也答曰夫佞言似忠奸言似  
信中人以上乃可語上始皇未及中人所以暗於識士  
前至渭濱帝復嘆曰此地寧復有呂望邪鮮之曰昔葉



公好龍而真龍見燕昭市骨而駿足至明公以旰食待  
士豈患海內無人帝稱善者久之宋國初建轉奉常赫  
連勃勃陷關中武帝復欲北討鮮之表諫及踐阼遷太  
常都官尚書時傅亮謝晦位遇日隆范泰嘗衆中誚讓  
鮮之曰卿與傅謝俱從主上有功關洛卿乃居僚首今  
日荅颯去人遼遠何不肖之甚鮮之熟視不對鮮之為  
人通率在武帝坐言無所隱晦人甚憚焉而隱厚篤實  
瞻卹親故性好遊行命駕或不知所適隨御者所之尤

為武帝所狎上嘗於內殿宴飲朝貴畢至唯不召鮮之  
坐定謂羣臣曰鄭鮮之必當自來俄而外啓尚書鄭鮮  
之詣神虎門求啓事帝大笑引入其被親遇如此以從  
征功封龍陽縣五等子景平中徐傳當權出為豫章太  
守時王弘為江州刺史竊謂人曰鄭公德素先朝所禮  
方於前代鍾元常王景興之流今徐傳出以為郡抑當  
有以尋有廢立事元嘉三年弘入為相舉鮮之為尚書  
右僕射四年卒有文集行於世子愔始安太守

裴松之字世期河東聞喜人也祖昧光祿大夫父珪正

員外郎松之年八歲學通論語毛詩博覽墳籍立身簡

素年二十拜殿中將軍此官直衛左右晉孝武太元中

革選名家以參顧問始用琅邪王茂之會稽謝輔皆南

北之望松之拜此職時以為榮義熙初為吳興故鄣令

在縣有美績入為尚書祠部郎松之以世立私碑有乖

事實上表陳之曰碑銘之作所以明示後世自非殊功

異德無以允應茲典俗弊偽興華煩已久是以孔惺之

銘行是人非蔡邕制文每有愧色真假相蒙殆使合美者不貴以為欲立碑者宜悉言上為朝議所許然後聽之庶可以防過無徵顯彰茂實由是普斷武帝北伐領司州刺史以松之為州主簿轉治中從事史既克洛陽松之居州行事宋國初建毛德祖使洛陽武帝勅之曰裴松之廊廟之才不宜久居邊務今召為世子洗馬與殷景仁同可令知之時議立五廟樂松之以妃臧氏廟用樂亦宜與四廟同除零陵內史徵為國子博士元嘉

三年誅徐羨之等分遣大使巡行天下並兼散騎常侍

班宣詔書奉二十四條松之使湘州甚得奉使之義論

者美之轉中書侍郎司冀二州大中正上使注陳壽三

國志松之鳩集傳記增廣異聞既成奏上上覽之曰此

為不朽矣出為永嘉太守勤恤百姓吏民便之後為南

琅邪太守十四年致仕拜中散大夫尋為國子博士進

太中大夫使續何承天國史未及撰述卒時年八十子

駟南中郎參軍松之所著文論及晉紀駟注司馬遷史

記並行於世駟子昭明昭明子子野列在齊梁二史

何承天東海郟人也從祖倫晉右衛將軍承天五歲失  
父母徐氏廣之姊也聰明博學故承天幼漸訓義儒史  
百家莫不該貫武帝義旗初建長沙公陶延壽以為其  
輔國府參軍遣通誠於武帝撫軍將軍劉毅鎮姑孰版  
為行參軍毅嘗出行而鄢陵縣吏陳滿射鳥箭誤中直  
帥雖不傷人處法棄市承天議曰獄貴情斷疑則從輕  
昔有驚漢文帝乘輿馬者張釋之劾以犯蹕罪止罰金

何者明其無心於驚馬也故不以乘輿之重加於異制  
今滿意在射鳥非有心於中人按律過誤傷人三歲刑  
況不傷乎徵罰可也轉為武帝太尉行參軍武帝討劉  
毅留諸葛長民為監軍長民密懷異志劉穆之屏人問  
承天承天曰公昔年自左里還入石頭甚脫爾今還宜  
加重複穆之曰非君不聞此言今日願為丹徒劉郎恐  
不可復得也宋臺建召為尚書祠部郎與傅亮共撰朝  
儀謝晦鎮江陵請為南蠻長史晦進號衛將軍轉諮議

參軍領記室時有尹嘉者家貧母熊自以身貼錢為嘉償責嘉坐不孝當死承天議曰法稱違犯父母教令恭謹有虧父母欲殺皆許之其所告唯取信於父母謹尋事原心嘉母辭自質錢為子償責嘉雖犯教義而熊無請殺之辭今而殺之非也元嘉三年晦將見討其弟瞻密信報之晦問計於承天曰若果爾卿令我云何承天曰以王者之重舉天下以攻一州大小既殊逆順又異境外求全上計也以腹心領兵戍義陽將軍率衆於夏



口一戰若敗即趨義陽以出北境其次也晦良久曰荆  
楚用武之國兵力有餘且當決戰走不晚也使承天造  
立表檄及晦下承天留府不從到彥之至馬頭承天自  
詣歸罪彥之宥之後補尚書殿中郎兼左丞吳興餘杭  
人薄道舉為劫制同籍期親補兵道舉從弟代公道生  
等並為劫大功親非應在補謫之例法以代公等母存  
為期親則子宜隨母補兵承天議曰尋劫制同籍期親  
補兵大功則不在例婦人三從既嫁從夫夫死從子今

道舉為劫若其叔父尚存應制補謫妻子營居固其宜也但為劫之時叔父已歿代公道生並是從弟大功之親不合補謫今若以叔母為期親令代公隨母補兵既乖大功不謫之制又失婦人三從之道由於主者守期親之文不辨男女之異愚謂代公等母子並宜見原承天為性剛愎不能屈意朝右頗以所長侮同列不為僕射殷景仁所平出為衡陽內史昔在西方與士人多不協在郡又不公清為州司所糾被收繫獄會赦免十六

年除著作佐郎撰國史承天年已老而諸佐郎並名家  
年少潁川荀伯子嘲之常呼為妳母承天曰卿當云鳳  
凰將九子妳母何言邪尋轉太子率更令著作如故時  
丹陽溧陽丁況等久喪而不葬承天議曰禮云還葬當  
謂荒儉一時故許其稱財而不求備丁況三家數十年  
中葬輒無棺櫬實由淺情薄恩同於禽獸者耳竊以丁  
寶等同伍積年未曾勸之以義繩之以法十六年冬既  
無新科又未申明舊制有何嚴切歟然相糾或由隣曲

分爭以興此言如聞在東諸處此例既多江西淮北尤為不少若但謫此三人殆無所肅開其一端則互相恐動臣愚謂況等三家且可勿問因此附定制旨若人葬不如法同伍當即糾言三年除服之後不得追相告引十九年立國子學以本官領國子博士皇太子講孝經承天與中庶子顏延之同為執經頃之遷御史中丞時魏軍南伐文帝訪羣臣捍禦之畧承天上安邊論凡陳四事其一移遠就近以實內地其二浚復城隍以增阻

防其三纂偶車牛以飾戎械其四計丁課仗勿使有關  
文多不載承天素好奕棊頗用廢事又善彈箏文帝賜  
以局子及銀裝箏承天奉表陳謝上答曰局子之賜  
何必非張武之金邪承天博見古今為一時所重張永  
嘗開元武湖遇古冢冢上得一銅斗有柄文帝以訪朝  
士承天曰此亡新威斗王莽三公亡皆賜之一在冢外  
一在冢內時三台居江左者唯甄邯為大司徒必邯之  
墓俄而永又啓冢內更得一斗復有一石銘大司徒甄邯

之墓時帝每有疑議必先訪之信命相望於道承天性  
褊促嘗對主者厲聲曰天何言哉四時行焉百物生焉  
文帝知之應遣使先戒曰善候何顏色如其不悅無煩  
多陳承天與尚書左丞謝元素不相善二人競伺二臺  
之違累相糾奏太宰江夏王義恭歲給費錢三千萬布  
五萬疋米七萬斛義恭奢侈用常不充逆就尚書換明  
年資費而舊制出錢二十萬布五百疋以上並應奏聞  
元輒以錢二百萬給太尉府為承天所糾上大怒遣元

長歸田里禁錮終身元又舉承天賣茭四百七十束與  
官屬求貴價承天坐白衣領職二十四年承天遷廷尉  
未拜上欲以為吏部郎已受密旨承天宣漏之坐免官  
卒於家年七十八先是禮論有八百卷承天刪減并合  
以類相從凡為三百卷并前傳雜語所纂文及文集並  
行於世又改定元嘉歷改漏刻用二十五箭皆從之曾  
孫遜梁史有傳

通志卷一百三十四





總校官庶吉士臣侍朝

校對官中書臣馮培

膳錄監生臣任穎